



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.357/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kymete Kicaj kryesuese, Skender Çoçaj dhe Arsim Hamzaj anëtarë, duke vendosur përkitazi me ankesën e subjektit politik Partia Demokratike e Kosovës (PDK), me seli në Prishtinë, paraqitur kundër subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 07.02.2025, merr këtë;

V E N D I M

REFUZOHET e pabazuar ankesa A.nr.357/2025 e datës 04.02.2025, parashtruar nga subjekti politik Partia Demokratike e Kosovës (PDK), me seli në Prishtinë, kundër subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatës fushatës zgjedhore, për Zgjedhjet e Përgjithshme për Kuvendin e Kosovës, që do të mbahen me datë 09.02.2025.

A r s y e t i m

Me datë 04.02.2025, PZAP-i, ka pranuar një ankesë nga subjekti politik Partia Demokratike e Kosovës (PDK), në të cilën theksohet se me date 02.02.2025 në ora 19:00, në hapësirën publike është mbajtur tubimi i subjektit politik LVV, në Sheshin "Adem Jashari" në Komunën e Ferizajt, pa siguruar paraprakisht leje nga institucioni, ku në këtë tubim subjekti LVV, ka bërë shkelje të Rregullores Zgjedhore Nr. 07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, respektivisht nenit 4 paragrafit 2 i cili shprehimisht thotë: *Subjektet politike të certifikuara, mund të mbajnë tubimet në hapësirat publike, në institucionet arsimore, sportive dhe kulturore, ku nuk pengohet puna e rregullt e tyre dhe pasi që kjo të lejohet nga institucioni përkatës dhe KKZ.*

Më datë 04.02.2025, PZAP-i, e njoftoi subjektin politik Lëvizja Vetëvendosje (LVV), për ankesën e paraqitur kundër tyre, duke i dërguar kërkesë për përgjigje deri me datë 05.02.2025 në ora 11:00.

Në përgjigjen në ankesë të datës 05.02.2025, të subjektit politik Lëvizja Vetëvendosje LVV, theksohet se me datë 02 shkurt është mbajtur tubimi i Lëvizjes Vetëvendosje, në qytetin e Ferizajt, dhe se pretendimet e ankuesit janë të pa bazuara siç ligji i detyron për parashtrim të një ankese edhe pse të njëjtit nuk bashkëngjisin prova që të mbështesin pretendimet e shkruara. Andaj konsiderojnë se nuk e kanë obligim ligjor që të bashkëngjisin lejen, për arsye se këto i përkasin palës ankuese e cila duhet ti mbështes thëniet e saj me prova. Më tutje në përgjigje në ankesë theksojnë se për hir të së vërtetës ja kemi bashkangjitur provën me të cilën kemi leje përkatëse, valide dhe ligjore për organizimin e tubimit të datës 02 shkurt 2025 në Ferizaj nga organi kompetent.

Përgjigjes në ankese i është bashkangjitur në cilësinë e provës Leja e tubimit.

Paneli, pasi që shqyrtoj dhe vlerësoi ankesën gjeti se:

Ankesa është e pabazuar

Paneli ka gjetur se bazuar në nenin 4 paragrafi 2 të Rregullores 07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, e cila shprehimisht përcakton” *Subjektet politike të certifikuara mund të mbajnë tubime në hapësirat publike, në institucionet arsimore, sportive dhe kulturore, ku nuk pengohet puna e rregullt e tyre dhe pasi që kjo të lejohet nga institucioni përkatës dhe KKZ*”.

Kështu që paneli me rastin e shikimit të shkresave të lëndës, vlerësoi se bazuar në Rregulloren Nr.07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, *neni 4 paragrafi 3 është parapare: se subjekti politik që dëshiron të organizojë një tubim politik, duhet ta dorëzojë formularin për njoftim për tubim në Komisionin Komunal të Zgjedhjeve (KKZ), jo më vonë se njëzetë e katër (24) orë para kohës kur është planifikuar mbajtja e tubimit me më pak se dyqind (200) pjesëmarrës dhe jo më vonë se dyzet e tetë (48) orë para kohës kur është planifikuar mbajtja e tubimit me më shumë se dyqind (200) pjesëmarrës, ndërsa nën paragrafi 4 thekson se : KKZ pas pranimit të formularit nga subjekti politik e regjistron në libër të protokollit dhe vendos për miratim sipas datës dhe kohë së pranimit të njoftimit*”. KKZ jo më vonë se ora 09:00 në ditën e tubimit e njofton policinë dhe zyrën për qëllime të monitorimit”.

Andaj Paneli bazuar në formularin e njoftimit për mbajtjen e tubimit politik nga Komisioni Qendror i Zgjedhjeve, ka vërtetuar se subjekti politik LVV, ka dorëzuar formularin për njoftimin për mbajtjen e tubimit politik me datën 02 Shkurt 2025, për mbajtjen e tubimit politik në sheshin “Adem Jashari” në Komunën e Ferizajt në ora 19; 00, dhe mbi këtë arsye Paneli ka gjetur se subjekti politik LVV në fjalë ka vepruar në përputhje me dispozitat e lartcekura, pasi që është vërtetuar se subjekti politik në fjalë përveç që ka marrë leje, përkatësisht e ka njoftuar Komisionin Komunal të Zgjedhjeve i njëjti me tubimin e mbajtur nuk e ka penguar punën e rregullt të institucionit në fjalë.

Andaj duke u mbështetur në nenin 117.3 të LZP-së ku përcaktohet se: *“vendosja për ankesat nga PZAP-ja mbështetet në dëshmi të qarta dhe bindëse*”, Paneli vlerësoi se pretendimet e palës ankuese janë të pa qëndrueshme dhe si të tilla i refuzoi, për faktin se subjekti politik LVV, lidhur me mbajtjen e tubimit politik me datë 02.02.2025, ka dorëzuar formularin për njoftim për mbajtjen e këtij tubimi në KKZ-KQZ, për të cilin tubim i është miratuar kërkesa

nga ana e KKZ-KQZ, andaj nga veprimet e përshkruara në ankesë dhe nga provat e ofruara si dëshmi parashtruesi i ankesës nuk ka arritur që të vërtetoj se këto veprime paraqesin shkelje të dispozitave të lartcekura të Rregullës Zgjedhore Nr.07/2024, dhe si të tillë të njëjtën e refuzoi si të pabazuar.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 të LZP-së, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa
Anr.357/2025 më datën 07.02.2025



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.